

濮川所聞記續編卷一

總敘

物產

斗門布出濮院

桐鄉徐志

陳忱鴛湖雜詠濮九娘橋雲絹奢蚩氓猶抱

陡門誇機絲價賤無人售年少相矜買廣紗

橋惟菰林一種吳涇劉園有之味美而無核俗呼塘棲橋是也

食品著名者有梅家蹄子石家餛飩

濮川風土記

鄭世元

不羨唐蹄與畢肚

自注蕪有唐蹄杭有畢肚

吾鄉食品足矣

酒蔣嫂蒸羊莫嫂糕



酒有三白十月白竹葉青和清玉蘭諸名色最著者曰盧三白上

泃院志

地宇

總記

嘉興府照磨廳署 雍正年在東河倉前乾隆乙巳置衙署於姜家街其署圯後或賃民房或寓僧寺嘉慶二十一年里人沈瑚唐鴻鍾錫章謝王鎮等勸捐并捐資於秀水界寺前街買陳姓屋一所計五進坐西朝東基地壹畝前通官街後至民居南至劉屋北至寺西官街改作官廨永為公占云

節孝祠 在翔雲坊坐落秀邑良五庄號內基地壹畝玖分五釐

坐北朝南前通官街後至香海寺龍潭統共屋肆進第一進店

面樓房兩間第二進平廳三間東有備衙一條第三進樓房三

間東西廂樓兩間第四進樓房三間東西廂樓兩間桐邑劉軼

羣劉琬鴻劉賦璜劉秉樞秀邑王夏氏 監生王羽達之妻夏益堂之女 王慶賓

王榮森捨屋作祠里人捐資修葺設主歲祀屋本王氏故產乾

隆四十五年賣與劉姓未經加絕劉王二姓俱愿捐作節孝祠

於嘉慶二十年乙亥六月立合同議據將第二進至

捨但第一進仍屬劉姓不在捐內祠門面無中

進東首樓房店面兩間賣入祠中計絕價洋錢壹佰肆拾圓其價  
衆紳士所捐屋後基地直抵幫岸河埠係王氏產王夏氏等一  
併喜捨以廣祠宇并議得氏之家廟仍供是屋後進侯氏等後  
嗣成有家室自行遷供住居先是丁卯歲王店鎮紳士李毅等  
捐建節孝公祠呈請立案蒙 前嘉縣主陸公詳奉 撫憲阮  
公以義舉可嘉批司核飭立案并將原詳通飭各府縣學如有  
里中善士振興義舉者皆可照此辦理並蒙賜題苦節可貞扁  
額頒發每歲春秋二期委學致祭遵辦在案吾里諸紳士因勸  
捐建祠并設義學於祠內以訓困窮子弟無力讀書者丙子閏

六月十三日楊樹本曹焯鍾振富岳鴻振唐湧朱晉錫等援王  
店成案繪圖籲叩 嘉興縣主乞會同 秀水桐鄉兩縣主詳

請 各憲立案奉批該紳士等捐建節孝公祠兼設義塾殊堪

嘉尚候照王店鎮成案會同 秀二縣通詳 各憲批示立案

粘附十九日 嘉興縣主趙公 秀水縣主陳公 桐鄉縣主

黎公申詳七月廿二日奉 嘉興府尊鍾公批既據通詳仰候

各憲批示錄報繳祠圖存七月廿六日奉 藩憲批據詳劉

軼羣王夏氏等捐建節孝祠并設立義塾洵屬義舉可嘉仰嘉

興府轉飭如詳立案仍候 撫二憲批示繳圖存奉 學憲汪

公批據詳紳士楊樹本等捐建節祠義塾好義樂善實堪嘉尚  
准卽如詳立案並准春秋移委府學致祭仍候 撫部院批示  
繳奉 護理巡撫部院額公批該三縣通詳紳士楊樹本等呈  
明捐建節孝祠以安嫠婦幽魂并設義塾以教困窮子弟實屬  
義舉可嘉仰嘉興府查明是否屬實每歲春秋委令府學致祭  
是否就便所需祭品銀兩出於何款其義學延師經費如何捐  
資詳候立案俾垂久遠而收實效仍候 學部院批示此繳圖  
存丁丑二月十八日 三縣主牒府學文云現屆春祭除出示  
曉諭外合行牒知爲此合牒貴學煩爲查照 憲批屆期前詣

該鎮致祭以勳盛舉須至牒者給示云除牒學遵照外合行出  
示曉諭爲此仰紳衿人等知悉嗣後每逢春秋二期捐辦祭品  
隨同儒學詣祠致祭毋違五月廿九日曹焯鍾振富等以伏查  
每歲春秋請委府學實係便道所需祭品銀兩及延師經費各  
款俱係焯等及里中士庶捐輸辦理稟覆 嘉興邑尊於六月  
初五日申詳奉 府批仰候轉詳繳

岳洙傳節孝祠徵信錄引言 節錄

歲辛未里中鍾丈民望與其從弟方毅先生暨戴秀章曹章漢  
陳鳳卜濮卿揆濮政衡諸先生率先捐資并募善緣而祠事有

其始基甲戌秋夏丈漢翹偕同事諸人募劉王二姓房屋基址以作祠宇乙亥繕完其墻設主歲祀綜而論之集議鳩工使祠事速竣不辭勞瘁者鍾君金綬也協力經理初終如一者沈丈松臣朱君蓉賦朱君鎮東沈君恭先徐君友仙也至於兼設義塾啟迪童蒙唐福泉先生也盡心訓誨俾困窮子弟咸循規矩者范衡之沈雲甫兩先生也爰輯徵信錄手書兩通一貯祠之流芳閣一存香海寺之集賢山房以備歲時臬布出入及捐施器用財賄田宅之所紀載

嘉慶二十二年九月十六日致祭

主祭官

桐鄉縣知縣黎公恂 照磨廳謝公廷鐸 駐防廳何公起相

與祭紳士及祠中後裔不下百餘人

呈稿

嘉慶二十一年閏六月十三日呈

嘉興縣主趙公請

具呈紳士楊樹本曹焯鍾振富岳鴻振唐鴻朱晉錫住濮院

呈爲捐建節孝公祠兼設義塾籲求詳請立案以垂久遠事切樹

等世居濮院鎮緣是鎮係嘉秀桐三邑毗連里中守節之婦茹荼

食苦百餘年來不下數百人其已請題

旌固已得邀

曠典而窮鄉僻壤實在有節烈茹苦者或子姓已經故絕不獲循例請旌以致湮沒未彰者尚復不少而未旌者例不得入祀縣祠今有劉軼羣王夏氏等願將坐落在鎮東河坊內圮屋三帶後面餘地立據捐捨所有前面第一帶兩間經樹等捐資向劉駿等承買改造大門作為節孝公祠凡曾邀

旌典則為設主於第三帶堂樓中其合例未經請旌者設主東西偏其貞烈之女及未旌者設主於第四帶堂樓中春秋二期捐資辦祭用以闡幽光而揚苦節謹備輜軒之採錄俾祠主有子姓者得就近展謁時伸水木之思再有里中困窮子弟無力讀書者甚多在

第二帶正廳設立義塾捐貲延師訓課尤慮經費不資力勸里人共勦其事俾里黨觀瞻愈知奮興而於造就之道亦稍有裨益伏查王店鎮紳士捐建節孝公祠呈請立案蒙前嘉縣主陸詳奉撫憲以義舉可嘉批司核飭立案並將原詳通飭各府縣學如有里中善士振興義舉者皆可照此辦理並蒙賜題苦節可貞匾額頒發每歲春秋二期委學致祭遵辦在案仰沐 憲批里中紳士踴躍捐資現在祠工將竣恐無檔案存留以致年久廢弛為此繪具祠圖籲叩 父師太翁伏乞會同詳請 各憲立案並賜請委府學師每期到祠致祭以便勒石永守以垂久遠以勵苦節而興

士風上具

捐捨房屋據

立捐捨房屋據劉

軼羣 琬鴻

賦璜

秉樞

今因我鎮同人議建節孝祠緣

無合式址地以故中止

軼

等先人曾於乾隆四十五年間憑中契

買翔雲坊坐北朝南王

廣廷

房屋壹所計共四進下連基地壹畝

貳分坐落秀邑良五庄號內四至載明原契後因王姓捐不交房

致控押遷前蒙

秀邑縣尊先將是屋店面四間遷交餘屋仍宕

不結今因眾募善舉

軼

等願將此屋除出店面四間餘屋叁進情

願捐捨公所但此房屋未經割絕今王姓當面立議不願加找情

願亦捐捨公所以作節孝祠宇自捐捨之後任從過戶辦糧起建  
節孝祠宇三面議定兩相情愿各無異言恐後無憑立此捐捨房  
屋據永遠存照

原契壹紙呈於

秀邑主臺下議歸

軼羣

收執

其第一進東首樓房店面兩間議絕與

琬

名下收管應歸

琬辦

糧壹分

西首樓房店面兩間議絕與

軼羣

名下收管應歸

軼羣

辦糧壹分

計開捐捨第二進平廳叁間東首備街壹條第三進樓房叁間

東西廂樓貳間第四進樓房叁間東西廂樓貳間

計開四至東至張屋南至劉屋滴水為界西至王屋北至第四進滴水為界

嘉慶二十年六月 日立捐捨房屋據劉軼羣 押

全弟 琬鴻 押

賦璜 押

姪 秉樞 押

見捨司事楊蔭軒戴秀章沈殷六陳南園濮于蕃曹章漢鍾方穀岳又豪沈星從沈志海孫載華沈宗崙鍾民望陳鳳卜王欽夏董松安夏漢翹朱蓉賦仲坤若唐福泉楊孝民濮卿揆濮政

衡朱邦和楊琴保楊樹菊陳寄芸書捨沈冠璜

其糧在良五庄內劉自豐戶下伍分劉駿戶下貳分伍釐劉驤戶下貳分伍釐計共壹畝推到節孝祠收辦是實

捐捨據

立捐捨據王夏氏仝夫弟 慶賓 嗣子 榮森 今吾鎮同人議建節孝

祠因無合式址地以故中止 氏 先祖翁 廣廷 於乾隆四十五年間

曾將住居壹所計屋四進坐北朝南在翔雲坊內下連基地壹畝

貳分坐落秀邑良五庄四至載明原契憑中賣與劉姓為業前已

得受正價訖基糧業經劉姓收辦今劉姓愿將是屋四進捐捨公



所氏等亦愿將未絕應找之價捐捨公所至此屋後尚餘基地計有玖分直抵帮岸河埠氏等一併捐捨以擴祠基并議得氏等發愿同捐惟冀先祖翁廣廷一支家廟仍供是屋後進以妥先靈倘氏等後嗣成有家室自行將家廟遷供住居自捐捨之後任從立戶辦糧拆卸起造倘有人言憑見捐人公全理直三面議定兩相情愿各無異言恐後無憑立此捐捨據永遠存照

房屋四進并備衙四至悉照前賣與劉姓正契并照

基地四至東至張屋南至捐捨屋第四進滴水西至墻外滴水北至小橋浜

嘉慶二十年六月

日立捐捨據王夏氏

押

仝捐夫弟王慶賓

押

嗣子 榮森 押

見捐楊蔭軒戴秀章沈殷六陳南園濮于蕃曹章漢鍾方毅岳又豪沈星從孫載華沈志海沈宗崙鍾民望陳鳳卜王欽夏董松安夏漢翹朱蓉賦仲坤若唐福泉楊孝民濮卿揆濮政衡朱邦和楊琴保楊樹薌陳寄芸王明宣王授之王禹坤王師隨王欽堯王松齡

其糧在良五庄內王彙千戶下計有玖分推到節孝祠收辦是

實

合全議據各執一紙

立合全議據王夏氏全夫弟慶賓嗣子榮森因先祖翁廣廷於乾隆四十五年將翔雲坊坐北朝南房屋四進憑中賣與劉姓為業坐落四至載明原契今吾鎮同人募建節孝公祠劉軼羣等願將第二進至第四進計共三進捐捨公所以作節孝祠宇但此產係氏原出已賣未絕今既眾募善舉劉姓允捐氏等不願加找亦愿捐公共襄其事自議之後任憑劉姓捐捨所剩第壹進店面樓房四間劉姓昆季早行分撥東首樓房店面兩間派與賦名下西首

樓房店面兩間派與軼羣名下氏等愿從公議日後永不加找作為絕產三面議定均無異言恐後無憑立此合全議據各執一紙存照

嘉慶二十年六月 日立合全議據王夏氏 押

全夫弟王慶賓 押

嗣子 榮森 押

允議劉軼羣 押

全弟 琬鴻 押

賦璜 押

仝姪 秉樞 押

見議楊蔭軒戴秀章沈殷六陳南園濮于蕃曹章漢鍾方毅岳  
又豪沈星從孫載華沈志海沈宗崙鍾民望陳鳳卜王欽夏董  
松安夏漢翹朱蓉賦仲坤若唐福泉楊孝民濮卿揆濮政衡朱  
邦和楊琴保楊樹薌陳寄芸書議沈冠璜

議絕契一紙

立賣議絕契劉駿今因節孝祠門面無出情願將祖遺分受坐北  
朝南樓房店面兩間下連基地壹分坐落秀邑良五庄號內四至  
開明於後憑中賣絕與節孝祠司事改造門面三面議定時值價

洋錢壹佰肆拾元其洋錢當日交清並無準折等情自賣之後任從  
過戶辦糧起建節孝祠門面三面議定兩相情愿各無異言恐後  
無憑立此議絕賣契永遠存照

其銀洋立契之日一併交足不另立收票

計開四至  
東至張屋 西至軼屋合柱為界  
南至官街 北至滴水為界

嘉慶貳拾年六月 日立議絕賣契劉駿 押

驤 押

居間王慶賓 押

曹良才 押

顧敬堂

劉軼羣 押

其糧在良五庄號內劉駿戶下五厘驤戶下五厘共壹分今推到節孝祠收辦

是實

捐捨據

立捐捨據孫曹氏今因年邁無後苦守五十餘載現有闔鎮紳士公創節孝祠宇氏天年之後自問例得入祠氏有祖遺平屋兩間在本鎮南新街坐西朝東坐落桐邑廿九都三圖情愿捐捨節孝祠內永作公產倘有人言氏自行理直不涉祠內之事恐後無憑

立此捐捨據永遠存照

計開四至

東至官街 南至王屋 北至王屋 西至王地

原契檢出作為廢紙并照

嘉慶貳拾貳年三月 日立捐捨據孫曹氏 押

見捐張有成 押

葉孫氏 押

夏樹東 押

基糧壹分陸釐在桐邑二十九都三圖孫性初戶下推到節孝祠

完辦是實

節孝祠完納漕糧

嘉慶貳拾壹年拾月

收良五庄劉自豐戶下西則糧叁分肆釐

收良五庄劉自豐戶下徵則糧壹分壹釐

收良五庄劉駿戶下西則糧叁分

收良五庄劉驤戶下西則糧叁分

收良五庄王彙遷戶下西則糧玖分

嘉慶貳拾貳年拾月

收二十九都三圖孫性初戶下糧壹分陸釐

按捐捨據劉自豐戶下糧伍分實收肆分伍釐

租券

立租票邵建安今因缺房居住情愿央中租到節孝祠公處店面間半言定每年租價錢陸千文正其錢按月交還不致拖欠恐後無憑立此租票存照

嘉慶貳拾壹年 月 日立租票邵建安 押

中人龐殿章 押

立租票及文學今因缺屋開張店業情愿央中租到節孝祠處桐邑南河坊南新街平屋兩間三面議定時值租價錢每年肆千文按每月交錢肆伯文作拾個月還訖不致拖欠兩邊情愿各無異

言今恐日後無憑立此租票為証

嘉慶貳拾貳年捌月 日立租票凌文學 押

居間 葉鳳鳴 押

夏炳權 押

捐資姓氏

陳南園 濮楊氏 職監濮廷輝妻 鍾方穀 捐洋錢肆拾

濮政衡 仲坤若 曹崑山 葉秀揚 以上各捐洋錢叁拾圓

曹章漢 朱覲天 曹元萃 曹良材 濮澗東 黃 呈虹 蔭綠

徐 悅安 方順帆 以上各捐洋錢貳拾圓 姚敬修 捐洋錢拾陸

鍾錦濤 楊琴保 以上各捐洋錢拾五圓 方石千姑 方菴園參軍女

鍾太初 鄒漢雄 顧聘如 鄒宗魯 沈 恭先 鳳儕 鄒富年

以上各捐洋錢拾圓 陳 治中 正傳 沈仁昌 以上各捐洋錢捌圓 顧鳳卜 捐洋錢柒元

高金氏 庠生高挺妻 楊貢琳 夏名表 孫性安 沈松臣

曹聖昭 徐奕于 凌振時 潘瑞天 岳謙宗 徐仁遠

申雄飛 以上各捐洋錢五圓 沈秀巖 戴秀章 柴玉書 以上各捐洋錢叁圓

陳啟元 姚嘉賓 唐春靄 以上各捐洋錢兩圓

捐捨門窗什物姓氏

唐福泉 助第二進兩副間屏門拾貳扇

宋惠諸 助第二進兩副間短窗拾貳扇

曹章漢 助第二進漆對一副

鍾方穀 助第二進義塾板桌拾張板凳念條

又助第三進中間長窗陸扇連上下檻砌

陳鳳卜誦芬 助第三進兩副間屏門拾貳扇

又助大廚一具

沈松臣 助第三進左首廂樓下風窗九扇連上下檻

濮政衡 助第三進右首廂樓下風窗九扇連上下檻

鍾民望 助第三進短窗兩扇

鍾金綬 助第四進義塾板桌拾張板凳廿條

又助第三進木燭捲五副

夏漢翹 助小錫捲壹對

陳涵六 助金漆木燭捲香爐

陳曹氏 助第四進中間長窗陸扇連上下檻砌工食

捐祭費姓氏

戴秀章 曹章漢 鍾方穀 沈松臣 夏漢翹 唐福泉

濮政衡 濮于蕃 岳又豪 沈驥衢 陳鳳卜 岳韻玉

杜載榮 徐敬天 張省之 顧聘如 濮卿揆 鍾民望

沈恭先 輔紹裘 朱蓉賦 朱鎮東 陳南園 朱觀天

濮澗東 曹崑山 葉蘭谷 夏樹東 夏君瑞 徐奕千

鍾太初 董大章 徐悅安 徐方來 方順帆 葉萬春

第宅

濮斗南宅 濮斗南仕宋為吏部侍郎理宗賜其第曰濮院 府志

顧南樓太史宅 在平橋東岸翔雲街

寺觀

西嶽廟 在鎮西即梧桐橋廟嘉慶丙子年所改

總管堂 在東新街坐北朝南 舊為靈官閣康熙年間毀改為總管堂門從西出

津梁

濮家大浜 載邑志圖

大板橋 報恩橋 俗稱半碗橋 竹西橋 皆在鎮西嘉慶戊寅里人

唐澗等募資重建

迎春橋 在陡門塘南乾隆五十七年僧濟如同里人戴秀章等

募捐重建 府志 橋不在鎮因鎮人募捐故記之

坊巷

永樂市 東臨大街南北俱為橫街西則義路街也遶濮氏居宅

之四圍宋末蠶織日盛元時明之公捐金置舍以便賈者賈人



鱗集因以永樂稱之 濮氏家乘

園圃

徐園 在思家橋徐氏於宅後築土為小山構亭於其上旁植花木楊蔭軒先生題曰南坪小嶼

雪舟 在翔雲街庠貢生王宗觀築於宅後陳古銘有記

祠墓

僧鶴峰墓 在西寺後仲改庵撰墓誌銘

贈文林郎沈劍文墓 在雙賢橋 太學生朱蔗泉墓 在陳家橋

金南聲墓 在百畝園子玉相祔 孝廉朱錦塘墓 在麵杖港

岳心宇墓 在越茂橋 俗稱野貓橋 南沈帶西 子聖錫曾孫位中元孫惺齋祔

王明甫墓 在正家橋內萬安橋北莫家浜口子宗觀孫仕超祔

古蹟

樵李屠敏瀾家藏仇十洲八景題下各綴數語亦頗雅麗未詳何人所撰如福善翠冷云殿閣巍峩松槐蔽日輕陰滴翠點染遊衫望之如畫翔雲高眺云朱檻雲平蒼林城繞遠山掛塔俯瞰如迎幽湖月滿云夾岸咸標畫閣遊船悉傍閑鷗一鏡高懸千波如湧西院纏霞云遙廊回擁千楹環梧覆高百尺赤暉溪下紫錦薨披化壇楓冷云深淺丹黃高林層出梅涇花午云曲溪玉合晝暖光

飛桐林秋雨云層舍長溪漁蓑唱晚輕煙籠碧雁落蘆巔荷塘晚  
風云殘霞秋水齒苔餘妍飛鳥歸林羣姬載酒 霽陽筆記

屠廣文濮院志云按吾族敏瀾先生名中孚康僖公會孫諭德  
公孫用明先生名某以字行敏瀾子也家藏仇畫濮川八景即  
此一本

濮川所聞記續編卷二

人物

鄉達

鄒士貴乾隆己亥 恩科舉人補餘杭縣教諭卒於官

職監

周暎字旦雯徵仕郎州通判 周暉字曉山儒林郎州同知 以上徐志

謝王鎮字安撫號竹筠候補布政司理問

曹韻玉字琪芳候補布政司經歷

貢生

吳陳勳字樹棠號琴逸瓌子桐鄉籍嘉慶丙子科優貢

篤行

岳鑑字明之號永菴嘉邑庠生武穆王二十三世孫明中丞和聲  
六世孫重建岳武穆王祠於郡之西關成父志也輯金陀祠事  
錄附刊家譜置義田四百畝祭田貳百畝郡城普濟堂捐貲襄  
理族黨嫻戚有無力喪葬婚嫁者引為己任公之祖由鎮南舊  
屋俗稱舊岳遷郡城次子鴻業字振坤號半農復家於鎮  
濮仲垣字于蕃號敬賢又號衛薇桐邑庠貢生幼失怙恃祖母沈  
撫之成立事沈盡孝泣陳苦節請 旌建坊性聰穎過目終身

不忘力學無間寒暑其文為學憲李郁齋先生所賞公居心正  
直接物謙讓凡睦族恤貧諸懿行不勝枚舉乾隆庚子年發願  
建橋梁修道路葺鎮中及鄉間各菴費及萬餘金不惜也卒年  
七十有三

岳鏞字東宣號省齋生平方嚴自矢舉動必以禮節遇里人有爭  
必為排解以故里中數十年無訟者少與吳瓌沈琳項焜忻溥  
諸公敦道義交已而諸公相繼登雲路而公以諸生終晏如也  
所著有菊譜四卷省齋詩文集八卷

閨範一

湯烈婦秀邑許五觀妻許傭工自給積勞成疾卒氏越二十四日自經以殉年二十四乾隆五十七年事

王烈婦秀邑朱士興妻成婚後止生一女夫亡四十九日氏自縊身死年二十九歲嘉慶元年事也

徐惠蒼妻沈氏夫亡依弟登泰守節以終

曹曉倉妻陸氏二十九歲夫亡撫一歲孤成立守節四十二年

秀邑庠生蔣琮繼妻陳氏年二十九夫亡撫前氏子與所生子無

異嘉慶十九年卒

宋天城繼妻沈氏桐邑人年二十八夫亡撫孤朝選朝廸成立氏

病篤朝廸籲天割股以進疾遂瘳嘉慶二十年卒守節三十八年

曹元炳妻張氏桐邑人張際虞女年二十九夫亡孤均生纔八十

三日氏勤儉操作撫訓成立後忽兩目失明守節四十年

曹魯珍妻李氏年二十八夫亡撫孤尊三成立茹荼飲水足不踰

閩者二十年嘉慶二十一年卒壽七十三

夏用章妻楊氏桐邑人二十三歲夫亡守節五十年

秀學廩生張大廉字介孚妻王氏青年守志撫孤桂芳成立嘉慶

二十三年卒年五十四

監生項晉珠妻沈氏秀邑人年二十五夫亡二孤俱殤以夫兄辛卯科舉人焜之孫爲嗣守節二十七年

潘模妻孫氏桐邑人年二十夫亡撫姪耀爲嗣守節五十七年  
馮彥珍妻王氏秀邑人年二十三夫亡撫子明建成立守節五十九年

李貞女桐邑人幼字胡某未婚胡亡女守貞以終

楊士銓字選唐妻邵氏年二十九夫亡守節四十一年

監生陳天鱗字秉乾妻李氏二十七歲天鱗亡守節以終

孫振雲妻曹氏年二十九夫亡子紹榮又天撫育二女勤儉持家

長爲擇配嘉慶二十三年卒壽八十四

閨範二 現存

徐國榮妻徐氏夫亡守節現年七十七歲

監生俞大仁字振乾妻曹氏秀邑人年二十六夫亡無子舅姑以氏夫從弟應祥爲嗣氏勤儉持家舅姑喪葬皆氏竭力圖成以應祥子爲嗣現年六十餘歲

錢振乾妻沈氏秀邑人年二十九夫亡遺孤二人撫訓成立現年六十一歲

監生沈珠江字寶川妻夏氏桐邑人青年守志撫夫兄朗川次子

模爲嗣現年五十一歲

職監楊步蟾字桂巖繼妻顧氏桐邑人夫亡守志撫前氏子光祚  
文祥愛如已出所生子純祐年僅六齡以養以教慈而兼嚴  
蔣朝選字建勳妻鮑氏秀邑人年二十五夫亡越五日生遺腹子  
天貴朝選鮑之贅壻也氏事母撫孤勤儉操家以承二姓宗祠  
沈某妻錢氏沈叙高子婦也桐邑人年二十餘夫亡守志撫姪爲  
嗣長爲娶婦

沈祐妻歸氏桐邑人年二十六生子纔十日夫亡誓以身殉親族  
勸以撫育遺孤爲重乃勉進飲食撫孤守志

府學庠生項繩祖字念修妻李氏秀邑人贛州府知府枝昌孫女  
夫亡守志

桐庠生姚復隆字懋哉妻羅氏年二十八夫亡無子矢志守節家  
貧竭十指之力以孝事孀姑

金福麟本姓妻姚氏桐庠生復恒姊年二十五生子慶璜甫四十  
日夫亡家貧守志

監生夏承烈字雍京妻鍾氏桐邑人成婚四十三日雍京以疹疾  
亡時年二十一氏年二十三矢志守節

莊聿德妻姚氏桐邑人庠生復賡姊年二十九夫亡無子矢志守

節

藝事

翟大坤字雲屏工詩畫遷居吳門子繼昌字琴峯世其業

大坤枚吉之孫

流寓

施學義字紹周宋兵部員外郎內孚之後內孚由曲阜徙歸安其裔子固遷桐鄉明末公去城遷居濮院父敬閑早亡事母潘盡孝母嗜海味常冒風濤遠致之不令母知楊某鬻綢負債七百金索之者衆窘而自經公亟救之為任其所負仍假以貲俾理故業染匠某失銀紬若干度無以償迫而投水公救出之授以



已紬俾分償焉都某貸金於營卒積逋至二百金拷掠無完膚公往任其逋某得不死山陰邵某寓濮院以醫致富或誣以殺人公力為營救事乃得白諸以田廬若子女來質者度不能償輒還其券出儲粟以活饑民築亭鑿井於官塘以庇暑者渴者生平善事不可枚舉而尤篤於倫誼兄起周多子公舉分授之產盡以讓兄兄再售諸人再為之贖兄居燬於火為之更築如已居兄沒撫其遺孤娶婦析產如已子族人之貧不自振者婚嫁愆期者喪不能斂葬者多方助之俾如其志延名師教其子元勳元燾並登膠庠晚自號洪崖遠近咸稱洪崖長者推擇為

鄉飲賓年八十餘以壽考終節錄潘耒撰施紹周傳

方彙征幼孤事母孝待上五兄無間言生臨山衛長客揚州明季大荒相繼加以兵燹屍骸枕藉公悉捐所有募力儘埋約以千計挈家徙於濮院居無何因里素產絲綢業是者買賣價直相爭有某姓頗饒共嫉其短價擁於福善寺中拂以汗穢禍且莫測公片言理論事遂冰釋各歡謝而去曾孫學沆雍正丙午舉人節錄續遜志齋古文

王明甫由閩遷濮川服賈致富與里中陳楊忻曹戴諸族並稱以詩書廸後子維新字宗觀號雪舟秀水庠貢生孫景蘭號筠齋

太學生仕超號辰舍庠貢生著有驪珠亭印譜皆好施載入府志曾孫達字郡威庠生家譜

方外

照遠香海寺天香房僧桐邑侯盧公國柱給功幾面壁額

立宗重建積福庵

意誠募資重建白雀禪院

藝文

重修賢授禪院記 秀邑志

仲宏道 改菴

我儒聖賢授受則曰誠誠者真實之謂西方聖賢授受則曰幻幻



者空無之謂然儒亦曰空空則真未嘗不幻也佛亦曰真如則幻未嘗不真也吾友幻兮禪師修精舍于濮里之東臯顏曰賢授命名立意具得西來大旨工成請記于予予按院離郡三十里在鎮東北爲城鎮往來曩庚有橋曰好賢俗訛爲草野橋院在橋東畔前朝洪武初建亭以息行人萬歷己未建佛堂三楹易亭爲菴邑侯湯公額之曰賢授院之名自此始逮崇正庚辰碧光心傳二上人慕師精進遂延駐錫師爲文節法師之嗣其於以真觀幻以幻還真之道不啻照徹三途談空五蘊矣於是棲遲此地聊作歸休一溪烟柳嘗來白鶴之飛千樹松篁坐待黃梅之熟又不啻赤華

之館青豆之房也至己丑癸巳間鼎新前中二進堂宇增建佛像廚房置常住田三十五畝不費蟻蚨

而香岩聳壑自足雲厨

之供而玉粒齊山師於賢授厥功懋矣己酉間師之本師命師主蓆菴院事隨又治本師之喪庵中一切俱托其徒戒予戒予多方措辦庚戌冬重建藥師堂乙卯冬又建功德林約費四百餘金募施者不及什一戒予之善承師志於此可見不意今年春迦葉拈花世尊墮淚而戒予已湮槃也其徒宗尚於庚申冬主持院事復能守真抱璞玩月驚雷將見賢賢相繼授受無疆師之功行與金石竝垂不朽人何真幻之足云予爲記其大槩如此

樵李稗編自叙紀聞

吳宗奉伯讓

樵李稗編者匪祇採輯佚聞補綴史乘抑匪剽掇往事焜耀里閭蓋地介三邦聲名踵盛圖書鼎立稽核難周賢者相與忘之衆人遂淪罔識不有標著曷矢觀摩郡邑志云濮川古樵李地此樵李稗編所由彙也余生晚竊慕鄉先鉅老文行翹楚如有宋輔慶源先生爲理學砥柱迄今擬祀孔廟未嘗不嘉永新一邱之效靈遠也徐明道先生兄弟聯登宦蹟特著南宋皆能以經明行修式穀其後故其子若孫之聯鑣嗣響者指又不勝屈入明如鮑先生仲孚嘗舉省元後以理學者舊特膺太祖簡召授文華殿大學士先

生以老固辭許免朝請日晏而入先生猶固辭不得已勅賜放還而殿閣詞林記載廖道南之言曰商山茹芝千載不數人恂等龐眉皓首安車蒲輪雖竹帛所書圖畫所傳何以加焉先生今祀鄉賢列一郡之首而嘉秀崇桐諸邑分祀之江先生朝宗者家本會稽客游吾里以文學薦授翰林院編修一時詞翰之家無出其右常因應制賦詩稱旨特賜緋袍一襲後投簪請老仍占籍吾里遂繁子姓故得首列一郡文苑之科而嘉秀崇桐平海諸邑分表之餘姑未暇枚舉如楊宗道先生領永樂癸卯賓興首薦浚典四川福建文衡所取稱得人以太傅卒於官其子青聯登景泰初會魁

經義登錄實開桐邑甲第之始筮仕居給諫科七八年多所建明  
時人稱其得君陞河南按察僉憲又如岳石帆先生昆季發蹟里  
中相次聯第後皆位致通顯宦蹟磊砢石帆先生三賜爲民讀思  
皇帝諭祭文知方圖柄用惜其速捐而石梁先生則歷宦絕坎壈  
鄉賢踵祀此其梗概可識矣馮先生原泉篤于孝友爲能旁敷惠  
政績歷司藩沐寵最優再三錫誥更嘗總裁邑乘大以鼓動忠孝  
節廉小亦不乏風雅流麗之觀陸先生吉菴居鄉端謹以鄉薦歷  
仕不苟取與卒以古道自處斃于官竟無後乃今特先諸顯要祀  
鄉賢卽謂三代人心至今存可也猗歟休哉川之西南一隅爲梧

桐鄉與桐治相表裏川南東隅爲嘉之長水鄉其東北屬秀之靈  
宿一甌而三邑介焉其人物山川事蹟故應分載邑志而後起之  
彥輒以志列三邦忽于參核往往見游歷名山大川者自言有得  
及叩以本境之所有罔如也倘亦居鄉之所羞也已丑夏日郡國  
有修志之舉曾採近略若干則以備當事萬一遂取郡縣諸志及  
吳越以來應考之書而參訂之川地於春秋爲樵李自名樵李以  
後人地迭相靈傑川之字濮亦越三百年耳禾郡始於子城而間  
名樵李可知樵李之所該廣矣彙輯旣畢合舊載新入爲一編間  
訂傳聞之或異以規後進之信從復稽聞見之非誣以表人文之

疑郁雖云一隅堪深觀感余其有隅之心也乎集中所載誰復非隅亦誰復為隅者乎爰是分卷立則每有小論分見而此為言其畧以弁其端至於有言不文銓次失當則俟君子以考成焉

順治六年歲在巳丑閱夏歷秋冬川上居人吳宗泰伯讓氏題於庭草交翠之草堂

紀聞云按稗編一書係寫本僅首一帙得之殘卷中其大指為吾鎮而作然以構李名書其里至實該長水靈宿梧桐三鄉惟序文所指多屬鎮人而輔氏則居永新徐氏則居鳳鳴里非鎮產也

陳禹錫先生傳 紀聞

朱光祖 掌繪

吾師陳禹錫先生以文學著名當時性耿介立身行已尺寸不踰禮節少習舉業耄而弗輟數奇屢躋小試然清正自持不為詭遇雖坎坷終身恬如也居恒崇尚經術友教濮川學者爭先事之先生因其質而陶冶焉雖遇頑鈍者必曲為成就每開講堂學者環坐而聽館舍幾不能容以故門下士皆克恂恂雅飭一望而知為先生弟子如鄭耕餘昆季阮松巖陳夔一古銘謹堂及予兄人千輩文章品望後先輝映均無忝師門領袖其餘從學之士不下數百且有相繼授經至三世者嗚呼若先生者可以為師矣尤嗜南

華經讀至會心處琅琅聲徹戶外寢食俱廢爲文章縱橫馳騁落  
落自喜不加點竄其不入時眼者亦由此先生難弟睿聞先生爲  
邑諸生學問行誼與先生同下帷雪溪語水間交游盡四方之雋  
啟迪後進亦以經義爲宗顧才豐遇畚亦同於先生何耶先生子  
嘉齡秉姿絕人髫年卽淹貫經史雖家學淵源亦宿慧也予先伯  
父聖成公見而奇之妻以女乃甫弱冠而天先生遂無後遺予從  
姊青年矢志飲茹冰蘖者三十餘年顧傷貧賤未克表揚然而青  
閨苦節足徵道學家風俾得一畜道德而能文章之人之言以之  
取信於天下後世死者亦不朽矣先生德配某孺人弟睿聞先生

更飛觴 梅花俎豆禩生香春首欣逢憲乞觴德薄自慚虛令典  
蒹葭喜傍玉爲墻

桐溪雨泛

周璋伯信

清淺梧桐涇高明汗漫遊會當風雨夜落葉滿扁舟

以上徐志

庚寅六月二十七日雨雪

沈機海鷗

莫怪匡廬萬古冰江南六月凍雲凝愁看絮衲鋤禾叟笑倒荷亭  
冒雪僧驅暑不須搖白扇避炎何必賦蒼蠅荳蘿瓜葉凋零盡爲  
問梅花開未曾

西郊猛虎吟

歲次丁亥秋冬之際猛虎入我西郊麗  
然如驢吼聲若雷斑華耀金怒目流火

僕川所聞記續編卷二

七

李耳連宵逐李兒

自注江淮南楚之間謂虎為李耳虎食物

梁鸞

參爾計何癡未成頭角應初乳漸炳文斑不是鷓鴣地怒颯榆盡

拔當門巨跡石如泥只嫌杯上村家塚北走渡河何不為

鷓鴣笑軒集

濮川竹枝詞

三月三日元帝誕辰觀社會而作

濮 滎

澹軒

舊事蘭亭修禊辰春風河上畫圖新洛陽零落今非昔不及江南

蠶水濱

濮川予故里始祖曾捨宅為寺趙松雪書江南福地顏其額云

此會曾經數十年滄桑不改舊香煙當時多少朱門客翠裏珠粧

擁畫船

山塘近草

孟夏過贊公姪村居

濮映康

淑元

配某孺人子嘉齡婦即余從姊節孝朱孺人歲戊寅某月先生姪東侯堯亭卜兆於祖塋之側以次葬焉光祖親受經於先生知先生家世念先生德行道藝洵堪維風教而型後學以恐湮沒據聞見所及略述梗概以俟後之表彰潛德云

陸烈女傳

楊

澧 湘帆

烈女秀水陸柔乾先生名元瑞季女也性端靜言不出閫知書曉大義非聖賢書輒焚之年十六母邁疾手足不仁女扶持抑搔不留餘力夜必焚香默禱願減已算以益母年如是者三載遭母喪水漿不入口父兄欲購葬地而無力女益勤女紅積錙銖助營藏

域濮生廷松字雲翹聘女濮生以疾卒凶問至女方執爨大慟卽  
縞素晚給嫂入厨闔戶自縊時嘉慶三年正月二十日也女年二  
十有二冬十二月濮氏迎其柩合厝於古林庵之西

論曰禮娶女有吉日而夫死者女齊衰而弔不曰以身殉之歸熙  
甫曰殉殤非禮也豈烈女未之聞耶雖然死生亦大矣慷慨赴義  
丈夫猶難之况巾幗乎如烈女者其可傳也哉

甲申上元賓筵第十次是日喜同介賓汪翁以明躬逢其盛

口號以贈翁名文煜  
鳳鳴里人

仲宏道 開一

汪翁德望冠桐鄉式燕嘉賓藉有光還羨古心兼古貌六旬矍鑠

溪迴野曠路西東寂靜衡門掃落紅飛絮白浮秧葉水縑聲高颺  
棟花風人家疎淡桑榆晚籬落蒙茸櫻笋空不漬胡麻清煮飯怕  
流殘屑到塵中 濮川詩鈔

濮院

錢 載 籀石

灘空堪洗足巷小自鳴機已過挑青節 紀畧云清明日食螺螄曰挑青 垂楊冷不  
飛籀石齋集

吾里報捷新進十二人俱少年

方學沆 莖園

記別黌宮四十年不知後起幾隨肩俄聞十二推英妙一夜鑼聲  
徹九天 莖園三刻集

桐香室

濮啓元 玉巖

鬱鬱梧桐樹清香遍水區凡鳥何由集終當引鳳雛

讀書臺

昔人味道腴文史耽成癖問君讀何書滴露研周易

松月寮

月色兼松淡松聲帶月輕彈琴一長嘯俯仰有餘清

雪筠齋

繞逕篔簹植幽人與結鄰萬竿經雪壓冷處湛精神

玉巖詩鈔

輓濮仙壺

楊紹祥 映墀

童年蚤已企高名絳帳譚經持論平得仰儀刑纔數載遽將詩句  
哭先生胸無一物消畦畛與到三杯見性情知己長洲老宗伯早  
垂青眼卜登瀛

幽湖夜泛

夏天燾 元升

秋來佳景滿湖邊月夜尤宜泛畫船蕩槳忽驚蟾影碎舉杯恰值  
桂輪圓曉妝臺畔霞光斂洗足灘頭水色鮮幾欲扣舷歌一曲恐  
驚沙上野鷗眠

雜識

聚桂文會



塵之坊有曰聚桂者趙某氏世居焉其子覲尤知尚文墨題其脩業之所曰聚桂軒待制杜公本既爲書其額又因司令濮樂閒氏來見且以記請余惟古者以桂喻君子如淮南小山之辭蓋傷賢者不得所而招之與隱者也覲將爲桂之顯者豈得爲小山之陽乎聚桂文會方作于樂閒氏余嘗主評裁而士之與是會者人固以顯之桂待之矣覲其可以桂自隱哉

節錄揚維楨聚桂軒記

### 倭寇

倭寇之起嘉靖間新安人徐海同其叔惟學友人汪直葉宗滿等往嶺南市易貨物飄洋到日本等國貿易折閱計窮惟學將海質

於倭主貸貲易貨回復勾其彙入寇嶺南惟學被指揮黑孟陽殺之倭主責海償貨海約內掠以償癸丑六月入嘉興海鹽乍浦等處甲寅二月劫海鹽龍王塘轉攻嘉興三月從硤石至崇德過石門鎮西去五月又從石墩涇至崇德殺掠而去乙卯海偕酋新五郎入浙西據柘林乍浦其黨麻葉向在崇德貿易知崇城備寡擁衆數萬人薄城下城陷俘戮數千人暮屯郵舍令妓王翠翹歌而行酒時胡御史宗憲方巡浙東星馳至崇德取酒百餘瓶置毒藥誘之倭中藥死者過半餘出王江涇仍督參將盧鏜總兵俞大猷率浙直狼土兵大敗之朝廷遂拜胡爲中丞海等久屯柘林乍浦

丙辰出寇嘉興皂林時中丞又奉命代張督府涇甫八日麾下兵止三千及參將宗禮所部兵八百人事急檄禮與裨將霍貫道鎮侯槐何翔率五十人突之殺倭百餘禮令嚴肅自崇德至皂林未及炊兵皆枵腹忽疾風傷火藥又外無應援禮與貫道侯槐何翔皆陷倭乘勝圍桐鄉宗憲引兵至崇德集諸司問退倭計崇德呂希周桐鄉濮文起歸安茅坤議遣辯士下海諭汪直直遣養子毛海峯欵定海關謝罪督府又遣華老人說海降海怒將斬老人所幸妓王翠翹解其縛老人歸告督府狀乃遣羅中書詣海說降陰賄翠翹令恣惠之海遂遣囚自謝因邀督府犒遂解桐鄉圍會麻

葉與海爭一女子有隙復遣說海縛麻葉陳東以獻海遂併有其衆而諸酋長則疑且怨海矣海見衆酋解體自念縛麻東有功率酋百餘胄而入平湖城求欵督府厚犒之出居沈庄復遣謀爲詐書遺其黨曰徐海受朝廷大官卽日將官兵盡勦倭酋自出降矣其黨果大亂明日督府出官兵縱火焚之海沉河死諸酋殲焉官兵執兩侍女一卽翠翹一名綠珠卽海與麻所爭者也指海沉所斬海首以獻先是遣謀下海厚賄翠翹使說海降日奏朝廷封爲大總兵鎮海侯王一品夫人故翠翹誠心欲降勸海就撫後以計殺海翠翹深知爲督府所賣負海意不自安海死翠翹見執督府

欲以賜順義酋長翹辭曰我所以不卽死者爲爾輩負約未與爾  
聲言之也今既如此寧爾負我我不可負海赴錢塘江而死縣志  
叢記

按岳通政駿聲重修元明觀碑記云觀故有石碑燬於倭寇之  
難元明觀即翔雲觀

顧高嘉牒蝗神節錄

歲在丁未六月壬午棠之邑蝗飛來崇將集于境時惟始秋莠者  
已孕一罹蝨賊則甲者不秀歲其何有於是知縣事前庶吉士顧  
高嘉謹牒于司蝗八蜡之神曰蝗之爲害歷古患之春秋時螽螟

叠見迄及唐宋有吞蝗以救災捕蝗以弭患者始雖爲禍甚烈然  
未有不爲至誠感格而終冥頑不靈也今

聖明在御四海乂安山川鬼神莫不歆恪某奉

天子簡命來守茲土茹蘖飲冰惟以撫綏爲急自反方寸質之天地鬼  
神實無所愧吏未失職蝗胡爲來當此彈丸之地十室九空卽使  
有成而穀賤病農朝不謀夕兼以賦稅交迫憊苦極矣神獨何心  
而不惻然乎蝗胡爲來惟我蜡神蝗之主宰而亦民之司命也予  
與神誓如予果苞苴有靈也則食予心殘民以逞也則食予心狐  
鼠竊柄顛倒是非任爪牙之播毒而令家不安枕人不貼席也則

食予心而且食予地獄不拔之身若吏無是三者則神亦敬聽予  
約期於卽日盡率種類徙於南溟倘有因循不戢以傷田禾爰飛  
爰止以冀禱祠則於民爲贖於神爲貪是不供爾職而抗

天子之命吏矣予當悉發丁壯與白叟黃童設法驅捕咸付一炬非殺  
蝗也殺蝗以罪司蝗之不職也神其聽之惟命

瑣志

### 米價

康熙三十三年夏青鎮濮鎮大疫 乾隆二十二年四月石米三

千四百有奇疫癘盛行濮鎮爲甚

縣志

### 掩埋

邵城普濟堂奉 憲收埋始於嘉慶丁卯每年立冬後各司事分

路查勘傳知圩保圍頭地戶遇有暴露朽棺先行編記或有屬識

認自願收藏囑令上緊收埋其餘俟冬至起收埋義塚倘年遠無

着地戶尚多模糊卽拔骨入甕就地深埋以便子孫日後收葬是

舉專爲暴露無着而設如有屬有地者就地掩埋有屬無地者拔

厝原地無屬無地者收埋義塚至於外邑卽就彼處義塚開穴深

埋小棺火化積習成風各司事先爲勸導令彼自埋如其不然收

歸義塚庶免清明冬至二節焚化之慘督全收掩葉雨村徐滌源

濮院戴秀章唐福泉夏漢翹鍾雲嶠掩骼徵信錄

助賑

乾隆三十五年監生楊繡封張志榮等有捐賑之舉呈明縣主給示事畢申詳各憲五十一年春里人復循前議分賑三月學憲竇公獎以好義可風額嘉慶九年十年又遇歲歉有力紳士仍各捐錢助賑十九年夏秋少雨田禾歉收二十年里人沈瑚唐鴻等請於當專勸殷戶共捐錢五千七百餘千分賑貧戶

寺鐘

香海寺四周皆水曰龍潭嘉慶乙亥夏潭中生蝦有光如螢丙子正月十三日東南房僧不戒於火延燒鐘樓僧顯蓮宗琳暨里人

唐鴻等募捐備材將復舊觀

鍾振民民望

朱 垠 曜南 參閱

楊培立初畧

歸 銘又新

松濤先生垂訓樸語目錄

自敘一首

讀書二十三則

人品三十則

養心一十八則

保家五要

老年三寶

兒童三寶

訓後語

宋 吳興 松濤先生垂訓樸語目錄

畜僕說

惜陰說

趁蚤歌五首

本來十樂

睡引

災荒記事二篇

詩十章

自序一首

垂訓樸語序

人之情不蹶於山而蹶於垤故聖人演易必致戒於方盛之時後  
生少年生長承平日不見凶荒兵甲侈然自肆將視羅綺如菅蒯  
鄙稼穡爲傖父事其不爲處堂燕雀者幾希噫此亦賢父兄之憂  
也昔阿衡述三風姬旦陳無逸唐張蘊古上大寶箴宋李文靖爲  
相日奏四方水旱盜賊純臣事君尙然况士庶之飭子弟乎幽湖  
前輩陳廣文著樸語數十則語語切實可傳余尤愛其載明季凶  
荒事讀之凜凜若行獨梁若涉春冰不寒而慄使人錄一通置之  
家塾庶幾觸目警心安不忘危嵇中散所謂爲稼於渴世一概之

益固不可誣也沈氏山臞適謀鉞棗以惠鄉閭因喜而爲之序麟  
山陳梓題

松濤先生自敘

余自三十以前蚩蚩莽莽未知作何生涯成何品格幾與草木同  
腐至三十始食餼鬻宮舌耕是給束縛於生徒者二十餘年雖寒  
氈如冰然於清風明月之下鷄鳴昧爽之時每有所得隨筆書之  
亦幾成帙迨苜蓿多年更往來吳越縱囊無長物而領略於青峯  
碧澗間者味復不淺於是檢點老生常談分列品則題曰垂訓樸  
語祇以傳我後人使賢愚可以並識高下可以通行稍有知覺者  
亦必不作無賴子至於超羣軼衆之資則經史如日月墳典如山  
河往聖前賢宏詞奧義博覽遐搜自足擴聞見而益神智又何藉



此諄諄訓語爲哉凡觀是書者當諒我一片苦衷採其意勿泥其  
言會其心勿循其迹則余有厚望耳如曰布之鄉邑傳之奕禩非  
不佞初心予亦何敢逃罪焉

垂訓樸語

桐鄉陳其德太華甫著

同里後學沈堯咨編校

讀書十三則

學者要肯讀書又要會讀書會則一字一句無不消歸肺腑不會  
雖口不絕吟無益也觀聖賢曰悅心曰自得可悟矣

吾人不讀書則心多縱逸縱逸則生昏倦血氣外浮精神內滯百  
病從此芽矣故却病惟在真讀書勿以攝生卽事爲兩也

吾人十分讀書只完善得一身今人未曾讀得幾分書便覺意氣  
揚揚可鄙可笑

學貴精不貴博精則左宜右有觸處卽得若博而不精譬如牙行  
百貨俱積終非已有耳

學者往往說某時可讀書某地可讀書此總是一團浮氣不肯讀  
書之故又有一等所誦習者隨人好尚所評論者拾人牙慧此總  
是口耳之學不會讀書之故惟是切切實實純純常常在在會心  
語語叅証方是肯讀書方是會讀書

二酉四庫所載無非古人之嘉言懿行讀書將藉之以範我身心  
耳若名色讀書而不身體力行則雖讀破萬卷與曾無一字同  
學者當以憂勤惕厲爲精神以流水行雲爲意趣如此則奮然日

進而暢然無不自得矣

吾人不能有必達之命當爲必傳之文不能爲投世之技當盡用  
世之具

省閒言語以補誦習則拙者敏省閒心思以繹義理則愚者通  
學者隨處當按定精神從容漸造以此爲學則有得以此作事則  
有功

吾人有大不幸者三一則不聞自己過失一則不見古人全書一  
則居惡薄之俗不得與仁人君子並處惟杜門讀書三者庶乎有  
濟

讀書人未仕當爲名教攸關之人既仕當爲君民倚賴之人致仕當爲鄉國推重之人方不愧讀書二字之意若以爲梯榮媒利之資非其旨矣

凡援筆作書最忌有苟且完事之念整而不板滯放而有紀律輕重頓挫疎密圓融使骨肉停勻筋脈堅好便是當家悟此道者并可言文

### 人品三十則

念念做好人然後知自家不是處處實實用苦功然後知學力不進處

一念自恕便是退轉地位一事讓人便是下流景况

增一分明敏不若減一分世情加一重振作不若去一重昏惰蓋驚世情則品俗任昏惰則品下

趨勢慕利之念中於隱微則菰蘆中便無豪傑驕侈怠敖之氣設於身體則華屋下便乏修持

矯語貧賤輕視富貴總是驕謫根株

今人處貧賤患難恨不得一日脫離所以着多苦楚費盡心機果能如魚之於水日習相忘更不知水之外尙有何境便可順逆一致便是素位而行

今人孰不知省儉然但知慳一文吝一物至於多言數窮妄行取困反不自惜不知心乃自家珍寶言與行正珍寶出世一省則寡尤寡悔不愧不怍出凡入聖盡繫於此奈何嗇彼而奢此也

忿言浮言戲言巧言俚言躁言傷心之言執拗之言有微長而忻忻欲露之言有意在此而故假彼之言有一於是便爲人品之累便見學問不得力

貴人有待好人直是無待善行有涯善心直是無涯人每於此處錯過

世言天道好還富貴不宜發蓋曾有念念積善代代積善亦爲取

善之盈而爲天之忌乎又少年早發每以爲不幸曾有從少積善而爲不幸者乎况求富貴十難一遂而求善得善去從當自定矣夫人在高天厚地之中偶處一焉同氣者有幾何人往來相識者有幾何人而乃同室戈矛朋儔敵國吾知此輩胸中險仄極矣大凡怨尤之念皆從見人有不是處生來見人有一分不是便見自家有一分是卽此自是一念深爲天道所忌亦是自畫地位宣尼無毀譽虞舜隱惡孟子曰後患可見聞人過失卽歷歷可指亦當含蓄况言出風影事關閨門忻忻樂道以博一時之快喪德損福多矣哀哉

吾人居心常以好事望人常以好意度人縱使百受人欺不失爲忠厚君子

凡庸下之資積習已深思欲爲善全無着手惟默念已往差悞處使愧汗四集翻然勃然正是善根發動處便可從此極力引去人非聖人不能無過過而能改仍是好人故以過告我者愛我之甚也以過責我則我之師矣若以過容我諒我則彼爲君子而我不過成爲小人乎

吾人有大愧怍者三一則不克自立依人以施面目一則學業人品常常只如此一則令人有可侮可慢之端及切齒之事

凡人除却一切苟且因循之念則事事有商量故做一日人當盡一日事做一件事當盡一事心

人非不能爲聖賢第患不能爲常人蓋吾人日用倫常間自有許多平平常常難盡道理惟此處一忽略所以再無着力處獨立於萬物之上乃爲有志能屈於萬人之下乃爲有養

讀新書而茫茫孰若讀舊書而亶亶交富貴而落落孰若交貧賤而諄諄服綺錦羅珍羞而有意矜持孰若太羹粗布易足而無厭也

凡遇夫不平之氣不堪之事愈當虛和婉轉徐觀竅會譬行險道

而不按轡徐行必立敗矣

遇人當患難之中稍出一言寬解真如以水濟火若揚其波鼓其焰彼之爲禍不益烈乎

與富貴人交宜遠不宜絕宜敬不宜褻與貧賤人交宜久不宜濫宜真不宜泛

學人旣屬孤寒凡富貴當塗之人非禮法正務出於萬不獲已者切勿宜輕見稍一不慎致彼言貌不恭意味疎略直如撻於市朝若旣晉接周旋更不宜把孤寒相露出些微不惟徒啓其慢侮且將顧左談右假彼拒此矣故對此種人只宜說幾句冠冕話耳

吾人積德正如積財奈財則人人知積念念思積至於德則茫然不省良心盡喪甚至刻薄一分快活一分雖財積如山心窮如乞丐矣

凡人有一念惡機生於肺腑縱外貌循循殊非好人彼蓋勢不便權未宜譬猶飢虎在筭一旦出柙則向之搖尾乞憐者益肆其搏噬之毒矣

古人云有陰德者必有陽報德何以曰陰正於人所不見處深自著力不惟不計利并不計名倘被人稱誦令人感激亦正於此考驗以堅吾志其惟人之所不見乎此言殊可深味

人不可有富貴之念更不可有富貴之態科名雖不可必得倘得來亦是常事何必矜持使胸中消却不去較寒素時別換一番氣槩此皆由學問不深力量不濟如此品格決不能幹大事業亦不能有大受用

佛家云缺陷世界焉得事事圓滿吾人當不堪之處正宜凝神定慮以素位行之此便是大自在法門不可生一煩惱相

### 養心十八則

學者無事養之全於有事驗之有心操之全於無心察之否則守於平時露於倉卒氣至而堅氣餒而弛總見工夫未真學問力淺

夫天理常存於寂靜故天下之福亦常聚於安貞是以渾朴退讓正天之所以福我而巧捷矜驕乃天之所以禍我也通乎巧拙之說者而吉凶在手矣

利欲二字如彌天網貪求一途如鐵門關在網中能輕身躍出在關中能劈頭打開非有真精神大力量者不能也宜以此自奮吾人凡著己處常念其失毋矜其得凡著人處常念其得毋幸其失則不欲勿施漸臻上達矣

人之一心祇可檢點一身身以外多周旋一分身以內便疎漏一分故修己以敬真徹上徹下語

學者未遇時當養我浩然之氣不可瑣屑襟期以傷大受既遇時當達我不忍之心不可眷戀家室以負輿情

心知天地鬼神不離左右自然常存敬畏心念祖孫父子相關一體自然能愛身名

人能養心定氣淡欲安神不論讀書時不讀書時時時定有長進當順境則以節操爲坊表當逆境則以廉隅爲砥礪方不爲境轉而能轉境

凡遇不平難處之事只有自反一着便覺天寬地濶當情慾縱肆之時只想生死二字便覺瓦解冰消

時時在心性上斟酌則學業人品俱有把握若在世事上周旋則異乎此矣

身垢易滌心垢難除日新又新永欽厥止千古真傳亶其在茲操舍存亡執玉是持

一時得意便似立身九天一時失意便似寘身九淵甚見其中無特操也

養心之法不必過爲有心不必過爲無心惟迫而後動不得已而後起使無事不可入吾身內無處不可超然事外則靜固靜動亦靜矣



學者惟是放心難收然收放心不貴黜聰墮體惟念念在天理上發脈事事從性體內擴充自然游思妄想不得關其慮矣  
吾人手中空乏曰手窮目不接詩書曰眼窮心好刻薄險仄曰心窮手窮者可委之命眼窮心窮咎將誰歸

嘗見庭草青青元霜適集私揣惟烈日或可起之不數日而被暄者先枯居陰者自若也因指謂同事者曰今之貧兒驟富正猶濃霜烈日之喻

大凡攝生之術第一戒色慾第二除煩惱第三節飲食第四慎寒暑第五均勞逸能此五者何必勤引導問吐納餌芝服朮而後延

年却病哉

保家五要 有引

保家之要有五日擇交擇隣擇親擇師擇地凡此都關係我身心能慎而擇之將見家風孝友人品秀異集福迎禧自然永遠今觀世上朝榮暮落乍隆乍替豈必天道使然抑亦於此未必究心故靈承無術耳欲保世繼序者請從此料理  
朋友五倫之一係吾身不淺善人宜交老成人宜交有學有道之士宜交至嫖賭荒淫及衙門訟師并不孝不友之徒總不宜一見卽機械變詐世之所謂能人正吾身之蝨賊也故要擇交

諺云隣舍好輔家寶可見隣之關繫不淺蓋隣與我朝夕相親熏陶漸染不在朋友下居仁里之中孝友媿睦卽我之師居惡薄之俗身多邪行口無善言卽我之賊也故要擇隣

世俗聯姻不論家風不論人物惟論貧富竟不知家風好兒女自然有家教則男有令室女有佳配矣何必慕其富厚勢利哉故要擇親

擇師教子孫非惟子孫福澤所資抑亦祖宗根基所賴最宜擇品行端方者一舉一動從幼卽有矩矱培得元氣好足爲善人君子便是福澤至於蜚英騰達富貴可期分內事亦尙來事耳故要擇

### 師

凡人家陽宅日夕居處其中必要門路台式不犯卦位生尅而無冲壓等煞至於陰宅祖宗父母骸骨藏於中則此地氣又與我祖宗父母相接矣必得善地營葬理氣合消納清人子之心始安若藉此以博富貴着意貪求而忍於暴露則又不可故擇地居五

### 老年三寶

第一要教訓兒孫第二要勸人爲善第三要隨分知足

### 兒童三寶

第一不可縱口腹第二不可任氣性第三不可弄乖巧

訓後語

凡教子孫須令以忠信爲本無論天資好歉俱要讀到十七八歲時使之通義理知廉恥其聰秀者令習舉子業如不能者有力則務農有智巧則爲工爲商各有所事切不可任其袖手遊食漫無一業後來敗壞家風玷辱宗祖皆此輩也爲人祖父者知之

畜僕說

吾人既列衣冠僕從雖不可缺然貴得力不須煩冗以食指太多亦是虛耗一路况此輩學好者甚少小則竊主之物大則損主之德至於俊僕尤爲所忌

惜陰說

凡人縱以百年爲期十歲以前尚屬童蒙五十以後又屬衰耗止有四十年可用精力者而夜復當其半歲時伏臘冠婚喪祭公務大略又費十年以此思之真所謂一刻千金

趨蚤歌 五首

讀書須趨蚤讀書不趨蚤後來徒悔懊精力本易衰光陰如電埽見人享榮華自己惟嗟老

孝順須趨蚤孝順不趨蚤高堂容易老甘旨盡吾歡菽水承顏好一旦恨終天珍羞總虛渺

積善須趁蚤積善不趁蚤趨向已差了念念貴操持時時宜探討  
方便在寸心陰德只嫌少  
作家須趁蚤作家不趁蚤終身怎能了俯仰俱吾事衣食原非小  
平生無料理求人常恨少  
教子須趁蚤教子不趁蚤大來多顛倒舐犢真可憐佑啟非草草  
蒙養是聖功琢磨全在小

本來十樂

吾人幸生爲萬物之靈不墮異趨此本來第一樂幸生於耕讀舊  
家覺人世寬展無礙此本來第二樂幸五官無毒疾身體毫無虧

損此本來第三樂幸產於中華勝地得山水之勝此本來第四樂  
幸佩服先聖遺言爲四民首此本來第五樂幸時際昇平無亂離  
之苦此本來第六樂幸得煮茗焚香頗知清况此本來第七樂幸  
祖先不造陰騭事覺吾身根基獨厚此本來第八樂幸門戶寥寂  
早晚免驚虞之患此本來第九樂幸心地要做好人不敢作無賴  
事此本來第十樂

睡引

初睡足日間應酬風過竹再睡足午夜元神漸停毒更睡足平日  
幾希早已續此時栩栩與天遊殊覺清虛滿懷腹可憐愚蠢昏濁

徒睡倒不知南與北可憐妄想紛紜子終宵勞攘神先枯我有睡  
訣報君知側眠曲膝心先臥君不見希夷先生只愛眠何須此外  
覓仙籙

災荒記事

予生也晚不及見洪永開闢之盛并不及見成宏熙皞之時猶記  
萬歷初年予始成童在在豐亨人民殷阜斗米不過三四分欲以  
粟易物便酸鼻棄去豆麥輒委以飼牛豕而魚鮮鼎肉之類比戶  
具足人以爲長享如是耳豈知人心放縱天道惡盈一轉眼而歲  
在戊子淫雨淋漓遠近一壑越已丑赤地千里河中無勺水鞠爲  
茂草者兩月當是時積米一擔博價一兩有六然米價騰貴僅以  
月計便覺野無青草樹無完膚而流離載道橫尸遍路矣過此而  
至天啟初年雖屢貴屢賤猶未至荒苦之甚也奈自魏黨播虐流

毒縉紳將海內忠肝義膽之豪盡化爲朽楊肺石之鬼於是天怒於上民怨於下卽新主英明果斷殲厥巨魁但一時元氣未能挽回下多草竊內憂外患約有二十餘載至崇正十三年大雨積兩彌月較之萬歷戊子水更深二尺許四望遍成巨浸舟楫艤於牀榻魚鰕躍於井竈有樓者以樓爲安樂窩無樓者或昇於屋或登於臺惟慮朝之不及夕也米價初自一兩餘漸至二兩餘至水退而吳興之農父重覓苗於嘉禾一時爭爲奇貨卽七月終旬猶然舟接尾而去也越明年爲崇正十四年旱魃爲災河流盡涸米價自二兩驟至三兩鄉人竟斗米四錢矣雖麥秀倍於他年終不足

以餬口或齧糠粃或齧麥麩甚或以野草樹膚作骨而糟糠佐之卽素封之家咸以麩就粥二餐者便稱果腹而一餐者居多夫棄其妻父棄其子各以逃生爲計耳若動用什物山積於市得用者半估攜之而去至美好玩弄之器莫有過而問者嗚呼民窮極矣不惟稱貸之門絕卽典質之物亦竭呼天而天不應叫閻而閻無路故朝而宛轉呼號暮而膝行匍匐一有傾跌便如在怒濤中不能復生或餘粒尙含而已僵仆矣仁人君子有不見之而泣數行下乎其有幸存殘喘勉完稼事而又飛蝗蔽野害及苗禾旣而溪流復涸不惟桔槔無力卽有力者其能挽天河之水以潤枯莖哉

且疫癘交作十室而五六其間就木者或有之而無木可就者不過以青蠅爲弔客以蒿蒲爲窀穸舉而棄之長流者不知幾何矣彼如日用之物無不數倍於昔卽雞之抱子鴨之生雛亦四五倍之以至豆之作腐非數十餘錢則八口之家不能沾唇又自猪料一貴中人家不能豢一豕所謂二母彘者早已付之鼎俎前此或白鏹一兩可得湯猪一口今則一猪首亦索價八九錢故昔之雞犬相聞者今卽開市之中傾耳聽之早上得一雞聲便如華亭鶴唳向來之荒不過以府計或以省計此一番不惟我浙近而南都遠而齊魯而洛下楚中至京師爲甚大約非死於兵則死於荒

不死於荒則死於疫生民幾何其堪此種種也豈造物生息太繁播此一番虐燄亦民生暴殄已甚故帝心厭棄至此耶但人心苦則善心生一飽煖便生縱恣縱恣則惡心生倘能長存米珠薪桂之思則人人可與證道豈特可以謀生也哉予恐後之君子不能長自警省故一點婆心托筆相告勿視爲老生腐談幸甚幸甚崇正十四年中元日松濤居士識

災荒又記

予於十四年秋曾記災荒矣不意其時之荒猶未爲極也至十四年冬租無粒吐糧則全輸小戶人口枵腹無策卽素封之家上則

迫於官糧下則困於家食縱有產無可售數十畝之家往往逃亡  
卽百畝千畝之子一時窘於官亦有棄之如脫躡者是時市上無  
米可買卽有米亦過而不問富者僅覓豆覓麥貧者或覓糟糠或  
覓腐渣貸得糠皮數斗便喜動顏色至十五年春青草初生遍野  
俱掬草之人前此猶擇草而食至此則無草不食矣鄉人成担担  
來須與罄盡卽鬻蔬果未有若此之速售也故男婦行乞往往接  
踵卽故家兒女亦不遑自惜且所得豆麥僅以粒計自朝至暮遍  
乞不盈一掬故不數日此輩盡入餓鬼道又別換一班行乞者矣  
至小而三四歲五六歲者往往棄之於市東街四五一羣西街又

四五一羣雖呼號哭泣之聲徹於通衢旁觀者徒扼腕頓足莫可  
誰何更有在懷抱者活投之中流唯有疾走不顧一法耳嗟乎父  
母愛子之心一旦變爲蛇蝎甚至有食其子者無論荒郊草市中  
此剗小斲一二頭彼剗將死大人一二頭卽府城亦或有之明知  
官法炳如死於杖楚之下彼亦遑自惜哉此亦千古所不經見之  
事不幸而身遘之也四五月間疫症又大作十室而八九甚至一  
二十口之家求一無病之人不可得又或一二十口之家求一生  
全之子不可得故始則以棺殮繼則以草殮又繼則棄之牀褥尸  
蟲出戶外鄰人不敢窺左足賴有好義之士糾衆捨地掘泥窖爲



瘞埋計或五十一壑或六十七十一壑不三月而五六十窖俱滿  
何可悲可涕至此也維時醫者門庭如市卽庸醫豎子亦奔走無  
寧足彼謂生意之太廣吾謂死機之益橫也又因病者祈祝太甚  
食物倍長於去年大雞二足得錢一千卽小而初能鳴者亦五百  
六百湯猪一口動輒自五兩至六七兩卽乳猪一口亦一兩五六  
錢至一兩七八錢若小廝婦女反不過錢一千二千又安見人貴  
而畜賤耶幸八月苗始吐花米價漸平病者少瘥民有起色但恨  
死者不能復生流亡者不能盡復耳嗟乎當此一番厄運連歲災  
荒一不死於饑再不死於疫便可稱無量福澤矣尙不警心刻骨

思所以上報天地仰報祖宗自快凶荒已過生一受用之想豈復  
有人心者哉予又不能忘情故復記之如此十五年八月中秋又  
書

松濤先生遺詩

煙竹

衰年何處着華顛  
愛向深深竹裏眠  
晝靜看殘千箇綠  
雨餘幽倩一溪煙  
鷓鴣啼樹迷清曉  
篔簹谷埋雲任落泉  
道是鎖窗思補密  
鑪聲纔沸鶴蹁躑

立春前五日

幽林閨寂最鍾情  
鎖斷河陰別緒生  
水底竹邀雲共冷  
梅邊人和月同清  
主多名酒煩觴政  
客有新詩壯墨兵  
臘盡不知營歲事  
寒禽幾欲變春聲

花郊閒步

春于此日最清妍刺眼風華別有天  
桃雨忽飛尋蠟屐杏帘難貫  
問榆錢香因遠俗神逾靜花對幽人色倍鮮  
僻嬾如余機欲躍莫  
教空負一湖煙

菊影

楊子談經擬太元靜中披對墨花仙  
三春羞逐羣英艷午夜還同  
瘦客眠神入夢來飛洛浦光從月下動  
湘煙幽棲恰得逢清晤吟  
到無聲證默禪

林中

是水皆神往無山不願家  
稅他十笏地栽得半畦花  
茶乳烹新火  
蘆蓀逗暖沙悠然領新意  
邱壑靜無譁

其二

地僻容疎豁交貧絕訪尋  
品茶添異味選石得知心  
放去愁腸冷  
閒來抱膝吟因君饒野韻  
林壑自鳴琴

訪菊

深秋閒訪菊信步陟香林  
霽色開虛屋清光薄遠岑  
幽花如靜士  
秋水似臣心有菊能淹客  
琴樽坐夕陰

嚴子陵釣臺

松響江流慣入聽故人高臥不知醒忘形此夕神方契太史何煩  
奏客星

其二

巖壑胸中絕勝遊天然圖畫列丹邱一絲不動澄江底坐落深更  
月下鉤

煙嵐雪夕

出來繪雪無全韻神味如茲韻有香千里蒼茫同一碧灞橋驢背  
費商量

